



## Arschkard

Arschkard

Wann de in de Schul net saache willschd, wu de herkummschd  
unn dich arg schämschd, weil de Lehrer unn die Kamerade die Nas runzele duhn  
wannse heern, dess de aus dere Siedlung kummschd wo die Bagaasch wohnt.  
Wo Nachts drei Kinner in äm Bett schlofe missen unn in dere selbe Nacht im Bett nebedrahn noch ähns  
gemachd werd, weil die Mudder ruhich hald, damit die Kinner nett uffwachen, wann de Vadder noch acht  
Bier soi Recht als Ehemann fordert. Wo de ganze Daach der Gestank  
vunn Erbsesupp, kaltem Schweiss, und billichem Schnaps in de Luft hängt.

Wann de dort gebore bischd, dann hoschd die Arschkard gezooche.

Wäschd , wie ich mähn?

Abber in unserm, Land do kriegschd nadierlich doi Chance, weil jeder des vunn ganz unne nooch ganz  
obbe packe kännt, hännse der gesahd. Dess mer an some Kischedich mit vier Geschwister, die wo des net  
schnallen, dess du raus willschd aus dere Siedlung, dess mer do kää  
Hausaufgabe mache kann unn dess jedesmol Zirkus iss, wann die Mudder es Geld fer neie Schulhefte  
gebbe muss, des hänn se der net verzählt.  
Unn wann de des durchgezooche hoschd unn die inn de Oberschul saachen, dess du was uffem Kaschde  
hoschd, aach wonn de vunn de Siedlung kummschd, dann bass arg uff, wann de dich es eersdche mol  
verliebe duhschd.

Wann des Märe net in de Siedlung gebore iss, donn hoschd die Arschkard gezooche.

Wäschd, wie ich mähn?

Weil, so lang du bei dere mit doim schlaue Kopp Punkte sammelschd, unn se ins Kino schleppschd unn in  
die Milchbar, so lang iss alles guhd. Abber wann die Händ unn die Lippe net mehr nur spiele duhn, donn  
hoschd Angschd, was vunn dere Siedlung zu verzähle unn drickschd re was vunn reiche Eltre uffs Aach unn  
loschd nix aus, was dich glänze lässt bei dem Märe. Bis der ganze Kardeturm zommeborzelt unn se dich grad  
so stehe lässt. Beim nägschde Märe bischd schlauer und nemmschd se mit Häm, unn se laaft ford unn kreischd,  
dess se Angschd hott, vor Krankheide unn so was. Unn die Nägschd, die lacht dich glei aus, wie se heert,  
wo de herkummschd.

Ich muss dort raus, denkschd, sunschd hann ich die Arschkard fer immer gezooche.

Wäschd wie ich mähn?

Vunn demme Daach ahn guckschd nimmi rechts unn nimmi links, loschd die Mäd aus unn hoschd nur Ääns im  
Kopp: du willschd erunner gucke unn net enuff. Unn weil de so eisern kämpfe duhschd  
unn weil de doi Ziel kää Minut ausloschd, machschd denne Weg kerzegrad noch obbe.  
Unn bischd wer, unn geltschd was, unn die Fraue wollen dich unn du nemmschd die erschd beschd unn  
duhschd se heirate unn bietschd re en himmel uff de erd. Unn eier Kinner wissen net, was des iss, die  
Siedlung. Abber du hoschd nur gelernt, wie mer noch obbe kummt unn wie mer wer iss.  
Wie mer liebt, des hoschd net in de Siedlung gelernt unn net uff de Schul unn aach net uff de Uni.



## Arschkard

Wann jetzt Ähner kummt, wo des kann mit dere Liebe, hoschd widder die Arschkard gezoche.

Wäschd, wie ich mähn?

Als die Dier vumm Möbelaudo zugeht unn doi Liebschdes, was de je gehabt hoschd, der nochemol winke duhd, do stehschd uff Äämol widder mitte in dere Siedlung.

Unn weil de dich jedi Nacht unn jeden Daach froogschd, warum de nix wert bischd und doi Herz mit immer mehr Schuld vollpacke duhschd, bleibt des Herz irchendwann stehe, ääfach so. Weils jetzt nimmi mitspiele will, unn mäht, es wär grad noch Zeit, dess de was lerne känschd,

Unn du lernschd unn heerschd unn kapierschd unn verstehschd unn glaabschd, jetzt wärschd endlich gescheit.

Abber wann de net loslosse duhschd, hoschd grad widder die Arschkard gezoche.

Wäschd, wie ich mähn?

Es Lebe iss arg guhd zu der unn schickt der Mensche uff doin Weg, wie de noch nie welche erlebt hoschd unn du schpierschd zum eerschde Mol, wie des iss, wann mer werklich liebt unn du brauschd net bewaise, wer de bischd, weil des kää Roll spiele duhd. Abber der Geruch vunn dere schieß Siedlung klebt an Dir unn vor lauter Angschd, dess de widder nur zu Besuch bischd, bis was Besseres kummt, machschd leis die Dier hinner der zu, damit de net im Weg bischd.

Unn weil die Daache sich neigen, ibberlegschd,  
ob die Arschkard die Oitrittskard iss, fer uffem Deibel soi Party.

Wäschd wie ich mähn?

Lesen Sie [hier](#) die komplette Diskussion zu diesem Text ([PDF](#)).